



Zahtjev Tužilaštva BiH nakon akcije Lištica PRITVOR ZA PET OSOBA, OSTALIMA MJERE ZABRANE

Procjenjuje se da su pripadnici kriminalne grupe u tri mjeseca nezakonito prodali najmanje 55 tona duhana, čime je budžet BiH oštećen za oko 7.850.000 KM

Tužilaštvo BiH je nakon ispitivanja od Suda BiH zatražilo pritvor za Zlatka Marijanovića (39), Stanka Čolaka (29), Miru Kvesića (58), Gorana Marijanovića (37), svi iz Gruda, te Ljubicu Čolak (48) iz Širokog Brijega. Njih su u akciji kodnog imena Lištica uhapsili pripadnici SIPA.

Razlozi za pritvor

Prema Zlatku i Goranu Marijanoviću, Miri Kvesiću, te Stanku i Ljubici Čolak predložene su mjere pritvora zbog opasnosti od bjekstva, zbog osnovane bojazni da bi boravkom na slobodi, u nastojanju da ometu i onemogućavaju vođenje krivičnog postupka protiv njih, uništili ili sakrili dokaze i tragove važne za krivični postupak, te uticali na svjedoke i saučesnike i da bi mogli počiniti novo krivično djelo.

Podsjetimo, u četvrtak su pripadnici SIPA razbili duhansku mafiju na području Hercegovine i Sarajeva i uhapsili 14 osoba i zaplijenili 23 tone duhana. Nakon kriminalističke obrade, iz službenih prostorija SIPA devet osoba je iste večeri otpušteno.

Nakon ispitivanja svih osumnjičenih, postupajući tužilac će uputiti prijedlog za određivanje mjera zabrane za preostale osumnjičene u ovom predmetu.

Osumnjičeni su pod istragom zbog organiziranog kriminala, porzne utaje, nedozvoljenog prometa akciznih proizvoda, nedozvoljenog skladištenja robe i pranja novca, a radi pribavljanja enormne nezakonite imovinske koristi pojedincima i nanošenja štete budžetu BiH u milionskim iznosima.

U akciji Lištica pretresena je 21 lokacija na području Gruda, Širokog Brijega, Čitluka, Zenice i Sarajeva. Tokom pretresa pronađeno je više od pet tona rezanog duhana, oko 18 tona duhana u listu, tri mašine za sječenje duhana, veća količina novca u gotovini, četiri putnička vozila, više od 800 kutija cigareta različitih marki bez porijekla i drugi predmeti koji mogu poslužiti kao dokaz u daljem postupku.

Procjenjuje se da su pripadnici ove kriminalne grupe nezakonitim djelovanjem u periodu od tri mjeseca prodali najmanje 55

tona duhana, čime je budžet BiH oštećen za oko 7.850.000 KM, a pribavljena protivpravna imovinska korist veća je od 1.200.000 KM.

Čija je drina?

Kao što smo već pisali, na području sarajevskog naselja Rakovica nađene su oko dvije tone sjeckanog duhana, koje su skrivali pripadnici tzv. duhanske mafije. U Zenici je nađeno 800 kilograma sjeckanog duhana i 16.000 cigareta, a na području Hercegovine nađene su mašine za sjeckanje duhana. Interesantno je da su među kutijama cigareta pronađene i cigarete engleskih naziva, kao i paklice drine, ali bez akciznih markica. Istragom bi se trebalo utvrditi da li su paklice drine nabavili bez akciznih markica i od koga ili su ih osumnjičeni sami napravili. Dio duhana u listu kupljen je u Srbiji i legalno dopremljen u BiH, gdje su ga osumnjičeni počeli rezati a da to nisu prijavili nadležnim institucijama.

D. PAVLOVIĆ



Zaplijenjeno pet tona rezanog duhana

Spriječen nezakonit promet cigareta

Pripadnici Jedinice granične policije Brčko jučer su oko šest sati spriječili prekogranični šverc 560 kutija cigareta, od čega 210 kutija eva slims i 200 merilyn bez akciznih markica, te 60 kutija ronhilla i 90 walter wolfa hrvatskih akciznih markica. Cigarete su otkrivene prilikom granične kontrole ope-la, bh. registarskih oznaka, u graničnom pojasu Stolin na području Brčkog. Vozilom je upravljao bh. državljanin Z. Š. (53).



U pretresima pronađene vage za duhan